

Raeujrub

Seizhah, ndithaemh ndingrongh, duzbid hemqgedged, heiq go'ngaeux homfwdfwd. Henz daemzngaeux naengh miz buz laux caeuq lwg nyez ndeu, geq va'gaeux ndaw daemz.


“Daxbuz, daxbuz, yawj gizhaenx, rongzcehngaeux!” Gou iet ok lwg-fwngzyinx bizbwd, vix rongzcehngaeux heuswd yaek roz youq gyang va-ngaex haenx. “Ae! Lij dwg mwngz dasoem!” Daxbuz lumh aen'gyaeuj gou, nyaeuq gokda de aenvih riu nyaeuq engq na lo. “Daxbuz,” gou youh naeuz, “gou aeu gou aeu!” “Mbouj ndaej, baeg lo, mbouj ndaej!” Gou mbouj cingznyiengh dwk mbeuj aenbak. “Daxbuz, gou aeu!” Gou lij gaengqgat dwk naeuz. “Lwg ien'gya neix!” Daxbuz fouznaih dwgrengz dwk daemx gyaeujhoq ndwn hwnjdaeu, byaij bae coh haenzhamq aen bo lingq

ndeu.

Ndwn youq dingj bo, yawjraen daxbuz maeuq roengzdaeu rod coh baihlaj, rod roengz henz daemz bae. Gizde namh cumx myag lai, de baez mbouj haeujsim, couh vaiqvet gyod doxroengz, cung roengz raemx bae. Ndwn youq dingj bo, gou lumj boux ngoemx nei, gangj mbouj ok vah. Lij ndei, de gaemdawz ganj mbawngaeux ndeu, cij ga ndeu caij roengz raemx bae. Daxbuz siujsim yupyup maeuq roengz, fwngzswix menhmenh soeng ganj mbawngaeux, gaem ndaet gij nywj gwnz bo, song ga daengq coh baihlaeng; lingh fwngz he soeng mbawngaeux ok, baez yamq baez yamq doiq daengz dingj bo. Gou rag gaiq fwngz caepcat uq namh de, ndawsim lij miz di lau. Daxbuz ajngaeb yaep ndeu le youh maeuq

roengz, rod coh henz daemz. Gou yawj aenlaeng gunggoz de, itseiz mbouj rox gangj gijmaz ndei. Youh dwg giz dieg de, gou sim diuqbubbub, yawj- raen de sien gaemdawz ragnywj, yamq ok gaiq ga ndeu, caij maenh le, youh yamq ok lingh gaiq ga. Liz haenzhamq yied daeu yied gyae lo, doeklaeng de mbaet dip va bae, euj aen rongz-cehngaeux roengzdaeu.

Caj de doiq hwnj dingj bo, mwh de mbiq rongzcehngaeux dawz cehngaeux ndenq hawj gou, raemxda gou sawqmwh lumj mboqraemx danh okdaeu nei lae roengzbyoegbyoeg: “Gou mbouj gwn, mbouj gwn cehngaeux lo……” De uet raemxda gou bae, nyaeuq gokda youh na lo, de mbiq caengz naengheu baihrog cehngaeux bae, yut simcehngaeux ok, dawz nohcehngaeux hausag cuengq haeuj ndaw bak gou. Cehngaeux




caengz cug gaeuq, miz di saep, hoeng cix dwg cingdiemz.

Gavaq de lij dumz, raemx ndik roengz laeng din gou miz di liengz, hoeng ndawsim gou, cix gig raeujrub.

Daengngoenz doek bya, buz laux ndeu lwg nyez ndeu menhmenh byaij dwk, ngauez song de, raezrang-rang……

(Gyanghsuh Swngj Danhyangz Si Vaznanz Sizyen Yozyau Yangh-cauj Vwnzyozse Cungh Swjyin)

Rengz Rag



Youq ndaw loq, gou vaq baenz diuz dah laecoco ndeu, lae gvaq bya sang, lae gvaq lueg laeg, doeklaeng gou caeuq doengzdoih gou doxcaez comz lae haeuj diuz dahljadeih he bae.

Gou deng lajdeih laeprou neix at ndaej diemheiq mbouj ndaej, doeng yawj sae yawj ra nditrongh, baez mbouj haeujsim bungq deng ndaek doenghyiengh youh ndaem youh co ndeu. “Doiq mbouj hwnj!” Henz rwz yiengj hwnj sing codaemq ndeu, “bungq deng mwngz caen doiq mbouj hwnj lo.” “Mwngz dwg byawz ha?” Gou byaengq hung lwgda, geizheih dwk yawj de. “Gou dwg rag, rag gomeizgveiq.” Baenzlawz gojnaengz ne?

Vameizgveiq geijlai gyaeunde, hoeng baihnaj ndaek doenghyiengh neix youh ndaem youh co. Gou yungh rengz bibi gyaeuj. De lumj yawj ndaej ok gij ngeizngwd gou, couh dawz ndang cab haeuj ndaw namh bae, mboujduenh soengq raemx hwnj gwnz bae. “Va baihgwnz gyaeu lwi?” Caem yaep he le de cam. “Gyaeu, gyaeu dangqmaz.” Ndaw geh laep gou yawjraen de riu ndaej gig angq.

“Mwngz vihmaz mbouj okbae ne? Baihrog miz ndit, miz nywj, miz va…… gyaeu raixcaix.” “Mbouj ndaej, gizneix liz mbouj ndaej gou.” “Mwngz bi'ndwen hwnz-ngoengz cungj youq giz laeprou neix, caen mbouj goengbingz.” Gou hojsik dwk naeuz. “Mbouj miz maz law, dujva gyaeunde, gou couh angq lo.” Gij vah de cungj dwg baenzneix lauxsaed simsoh, gou deng gamjdoengh lo, mbouj ndaej mbouj yungh lwgda boiqfug daeu yawj de.

Menhmenh dwk, gou daj ndaw loq ndiu daeu, gij cingzgingj ndaw loq, lij myumjgyumq yienh youq baihnaj gou. Soqlaiz mbouj geiqsuenq doxbeij swheij ndaejsaet, neix couh dwg gij cingsaenz rag, rengz rag, cungj cingsaenz dinghdingh gunghawj dwg gig sang gig ndei. Daj ciuhgeq daengz seizneix, daj ndawguek daengz rogguek, geijlai bouxmizmingz haenh gvaq gij gyaeunde dujva, cix lumzlawq rag gova. Rengz rag daemx gij gyaeunde dujva, gou yaek cuengqsing ciengqgo, yungh gij go ceiq ndeidingq daeu danqciengq rag, ciengqhaenh bouxguhong lumj rag mbouj okmingz neix, gyoengqde yungh caenh gij rengz swheij, vih vunzlai cau saedceij ndei. Cingq dwg rengz “rag”, cau'ok gwndaen vuenyungz vunzlai.

(Gyanghsuh Gauhyouz Vaigozyij Yozyau Sigijfungh Vwnzyozse Cen Minjavaz)

suenangq gojlgwnye

Saehaemax Dak Ndit

Miz ngoenz gyanghaet nditrongh he, saehaemax yaek hwnj gwnz faex hung mwncup bae dak ndit.

Saehaemax numqndwtndwt raih ok ranz daeu, de yawjraen roeghenj cingq youq gwnz faex angqvauvau ciengqgo. Saehaemax naeuz: “Roeghenj saunde, banhaet ndei.” Roeghenj naeuz: “Mwngz ndei, saehaemax, mwngz yaek bae gizlawz ha?” Saehaemax naeuz: “Gou yaek hwnj gwnz faex bae dak ndit.” Roeghenj bekbek gaiqfwd de naeuz: “Gyayouz, gou siengsaenq mwngz itdingh hwnjbae ndaej!” Saehaemax angq dwk naeuz: “Gyo' mbaiq mwngz, roeghenj.”

Saehaemax laebdaeb raih hwnj gwnz bae, de gaeng hanh rih roenroen, cix mbouj haengj yietnaiq. Saehaemax laebdaeb roengzrengz, raih dwk raih dwk, de menhmenh raih daengz gwnz faex hung lo. De yawj gwnzmbwn lamzyubyub, dujfwj hausagsag, gofaex mwncupcup, go' nywj heuswdswd, angq lai lo!

Saehaemax doenggvaq swheij roengzrengz, yawjraen funghgingj gyaeunde, hix gyau ndaej le baengzyoux ndei.

(Huzbwz Swngj Vujhan Si Cinghsanh Gih Ganghvah Siujyoz ngeih nienzgaep Yangz Hauhih)



(dozcap banjneix daj gwnzmuengx aeu)